

Na osnovu člana 18. Zakona o trezoru u Federaciji Bosne i Hercegovine („Službene novine Federacije BiH“ br. 26/16) te člana 107. Statuta općine Ilijaš - prečišćeni tekst ('Službene novine Kantona Sarajevo' br.20/09), Općinski načelnik, donosi :

P R A V I L N I K

o proceduri za povrat više ili pogrešno uplaćenih javnih prihoda sa jedinstvenog računa trezora općine

OPĆE ODREDBE

Član 1.

Ovim Pravilnikom utvrđuje se način i postupak povrata i preknjiženja više ili pogrešno uplaćenih javnih prihoda sa Jedinstvenog računa trezora Općine Ilijaš (u daljem tekstu: JRT).

Član 2.

Pod više uplaćenim javnim prihodom, u smislu ovog pravilnika, podrazumijeva se uplata koja je evidentirana na JRT u većem iznosu od propisane i utvrđene obaveze.

Pod pogrešno uplaćenim javnim prihodom, u smislu ovog Pravilnika, podrazumijeva se prihod koji nije uplaćen na način propisan Pravilnikom o načinu uplate javnih prihoda budžeta i vanbudžetskih fondova na teritoriji Federacije BiH i Odlukom o uplatnim računima, načinu uplaćivanja i evidentiranju javnih prihoda budžeta općine Ilijaš.

Pod uplatiocem, u smislu ovog Pravilnika, podrazumijeva se pravno ili fizičko lice koje je izvršilo višu ili pogrešnu uplatu javnih prihoda na JRT.

UTVRĐIVANJE PRAVA NA POVRAT VIŠE ILI POGREŠNO UPLAĆENIH JAVNIH PRIHODA

Član 3.

Postupak za povrat više ili pogrešno uplaćenih javnih prihoda pokreće se na osnovu pismenog zahtjeva uplatioca.

Povrat više ili pogrešno uplaćenih javnih prihoda, zbog tehničkih grešaka koje načini organizacija za obavljanje platnog prometa prilikom obrade naloga za uplatu, vrši se po proceduri koja je utvrđena ovim Pravilnikom.

Član 4.

Zahtjev za povrat više ili pogrešno uplaćenih javnih prihoda podnosi se za :

- a) porez - ispostavi Porezne uprave Federacije Bosne i Hercegovine (u daljem tekstu: Porezna uprava), nadležnoj prema sjedištu pravnog lica odnosno prebivalištu poreznog obveznika fizičkog lica i to za povrat onih prihoda o kojima Porezna uprava vodi analitičku evidenciju;
- b) porez na dohodak - Ministarstvu finansija Kantona Sarajevo
- c) administrativne i komunalne takse - nadležnom organu uprave koji je naložio plaćanje takse ili za čiji je rad plaćena taksa;
- d) posebne i ostale naknade - nadležnom organu za naplatu tih prihoda;

- e) prihode od pružanja usluga građanima i ostalim nivoima vlasti - korisniku budžetskih sredstava na čiju je budžetsku organizaciju više ili pogrešno uplaćen javni prihod;
- f) ostale prihode - korisniku tih prihoda.

Zahtjev za povrat više uplaćenih prihoda na u korist JRT Općine podnosi se nadležnoj službi Općine, koja je utvrdila prihod-obavezu svojim rješenjem.

Zahtjev za povrat pogrešno uplaćenih prihoda u korist JRT Općine podnosi se Službi za privredu i finansije.

Član 5.

Uz zahtjev iz člana 4. ovog Pravilnika prilaže se dokaz o izvršenoj uplati (ovjerena kopija naloga za uplatu) i drugi dokazi predviđeni zakonom i drugim propisima, kojima se reguliše prihod koji je više ili pogrešno uplaćen.

Član 6.

Nadležni organ iz člana 4. ovog Pravilnika može pismenim zahtjevom zatražiti od Službe za privredu, finansije i investicije informaciju o uplatama na JRT za koje je podnesen zahtjev za povrat više ili pogrešno uplaćenih javnih prihoda.

Pismeni zahtjev iz prethodnog stava sadrži: broj računa na koji je uplata izvršena, iznos uplate, datum uplate, žiroračun odnosno jedinstveni matični broj uplatioca i ostale eventualno potrebne podatke.

Član 7.

Nadležni organ iz člana 4. ovog Pravilnika i/ili Služba za privredu i finansije na osnovu analitičke evidencije i dokumentacije sa kojom raspolaže, te dokumentacije priložene uz zahtjev uplatioca, u skladu sa odredbama Zakona o upravnom postupku i drugim zakonima i propisima kojima je regulisan taj prihod, donosi Rješenje o utvrđivanju prava na povrat više ili pogrešno uplaćenih javnih prihoda.

Prilikom utvrđivanja prava na povrat više ili pogrešno uplaćenih javnih prihoda, Služba za privredu i finansije i/ili nadležni organ iz člana 4. ovog Pravilnika odgovoran je za praćenje rokova zastare potraživanja, u skladu sa važećim propisima iz oblasti javnih prihoda i zastarjelosti potraživanja.

Dispozitiv rješenja iz stava 1. ovog člana obavezno sadrži:

- a) visinu više ili pogrešno uplaćenih prihoda;
- b) šifru prihoda i općine;
- c) datum više ili pogrešno uplaćenih prihoda;
- d) identifikacioni broj podnosioca zahtjeva za pravna lica ili jedinstveni matični broj građanina;
- e) broj žiroračuna i naziv banke kod koje je otvoren za pravna lica;
- f) broj transakcijskog i tekućeg računa kod banke za fizička lica;
- g) broj budžetske organizacije, ako se radi o vlastitim prihodima budžetskih korisnika.

Dispozitiv rješenja iz stava 1. ovog člana treba da sadrži i druge podatke, koji su bitni za izvršenje povrata više ili pogrešno uplaćenih prihoda sa JRT.

Član 8.

Nadležni organ iz člana 4. ovog pravilnika, ukoliko sam obrađuje zahtjev, nakon pravosnažnosti donesenog rješenja o utvrđivanju prava na povrat više ili pogrešno uplaćenih prihoda, rješenje dostavlja Službi za privredu i finansije radi izvršenja povrata sa JRT.

Ukoliko nije učestvovala u obradi zahtjeva, Služba za privredu i finansije u skladu sa svojim nadležnostima, može zahtijevati od nadležnog organa iz člana 4. ovog pravilnika da dostavi kopiju kompletnog spisa predmeta, na osnovu kojih je doneseno rješenje o utvrđivanju prava na povrat više ili pogrešno uplaćenih javnih prihoda.

ODOBRAVANJE POVRATA VIŠE ILI POGREŠNO UPLAĆENIH JAVNIH PRIHODA SA JRT

Član 9.

Na osnovu dostavljenih Rješenja o utvrđivanju prava na povrat više ili pogrešno uplaćenih prihoda iz člana 7. ovog pravilnika i ostale raspoložive dokumentacije, Služba za privredu i finansije odobravanju povrata više ili pogrešno uplaćenih javnih prihoda.

Član 10.

Povrat više ili pogrešno uplaćenih javnih prihoda izvršava se popunom naloga za prenos sredstava, potpisanim od strane ovlaštenih lica, a na račun pravnog ili fizičkog lica kome se vrši povrat.

Nalozi za povrat mogu se ispostavljati djelimično u skladu sa tekućim prilivom na JRT.

POVRAT VIŠE ILI POGREŠNO UPLAĆENIH JAVNIH PRIHODA

Član 11.

Povrat više ili pogrešno uplaćenih javnih prihoda vrši se JRT Općine iz tekućeg priliva prihoda u ovisnost od vrste prihoda.

Ukoliko tekući priliv nije dovoljan za realizaciju povrata više ili pogrešno uplaćenih javnih prihoda u vremenskom razdoblju dužem od 15 dana od dana pravosnažnosti Rješenja o povratu, ili je vrsta prihoda sa kojega se treba izvršiti povrat ugašena, povrat će se vršiti iz tekućeg priliva korisnika prihoda odnosno sa šifre prihoda na kojoj ima priliva, uz uslov da prihod sa te šifre pripada 100% korisniku prihoda.

Za korištenje priliva iz prethodnog stava potrebna je saglasnost Službe za privredu i finansije osnovu koje se vrši preknjiženje sredstava za izvršenje povrata.

ZAVRŠNE ODREDBE

Član 12.

Služba za privredu i finansije je obavezna o izvršenim povratima i preknjiženjima obavijestiti sve učesnike u postupku.

Član 13.

Stupanjem na snagu ovog Pravilnika prestaje da važi Pravilnik o procedurama za povrat više ili pogrešno uplaćenih prihoda sa jedinstvenog računa trezora br. 04/1-14-71/13 od 10.01.2013. godine.

Član 14.

Ovaj Pravilnik stupa na snagu danom donošenja.

Broj : 04/3-14-1301/18
Ilijaš, 05.06.2018. godine

PREDLAGAČ:
Mr.sci. Osmanović Merima, dipl.ing.polj.

Osmanović!

OPĆINSKI NAČELNIK

Fazlić Akif, dipl.ecc.

